

ACCION★21
PLAN DI
PARTIDO
2025 - 2029

#BanBibaMiho
WWW.ACCION21.COM

CONTENIDO

MINISTERIO DI HUSTICIA	4
Polis	5
Brandweer	5
Corte	5
Legislacion - Directie Wetgeving en Juridische Zaken (DWJZ)	6
Prison	6
Fuseer inmigracion, douane y guarda nos costa	6
Revisa nos leyman di detencion	6
Expande acceso legal gratis	7
Departamento di integracion, maneho y admision di stranhero (DIMAS)	7
Adapta y aplica nos leyman di admision	8
Regularisa personanan indocumenta	8
Refugiado	10

#BanBibaMiho
WWW.ACCION21.COM

***MINISTERIO DI
HUSTICIA***

POLIS

Cuerpo policial ta encarga cu ordo y siguridad, ta importante pa gobierno provee tur e hermentnan necesario pa nan por cumpli cu nan tarea importante. Inverti den ekipo y facilidadnan adecua incluyendo celnan di detencion cu ta cumpli cu normanan internacional mester ta un prioridad. Nos kier mira un estudio independiente riba e cantidad di agente policial necesario y desaroya un plan structural cu ta inclui entrenamiento (Scol di Polis) adecua pa garantiza un cuerpo completo y motiva.

Nos kier mira expansion den uso di camera, specialmente riba careteranan importante. Tambe mester inverti den innovacionnan manera uso di drones, biometrics, body and dash cameras, license plate recognition technology, predictive policing, artificial intelligence, facial recognition software, mobile fingerprinting, reporting software y thermal imaging.

BRANDWEER

Nos kier sigura cu Brandweer ta consisti di un cuerpo completo y bon ekipo. Gobierno lo mester inverti den entrenamiento di mas local y sigui inverti den nan profesionalisacion continuo. Nos lo kier mira un estudio riba e tareanan di brandweer, nan ekipo y ki tipo di incidentanan mester ser atendi y den ki volumen. Despues di e estudio ta

importante desaroya un plan cu ta sigura personal suficiente y ekipo adecua pa e incidentenan cu nan ta enfrenta.

CORTE

Introduci un director y directiva pa corte mescos cu ta existi pa HOF, pa sigura standardnan di calidad, protocolnan di organisacion y un modelo di gobernacion pa corte. Mester percura cu personal di sosten ta completo y cualifica y cu nos corte funciona cu e mesun nivel di administracion y burocracia cu Hulanda pa evita cu cinco hues ta facilmente bira esnan mas poderoso den corte sin chekeo suficiente. Mester sigura e autoridad discrecionario di huesnan pero den un comunidad chikito, mester percura cu crimennan cu ta pisa hopi, manera abuso di mucha, ta haya castigo suficiente. Actualmente e castigo maximo den Reino ta cadena perpetua pero recientemente un tata cu a viola su yiu muhe di cinco aña a keda condena na unicamente nuebe aña, esey no ta aceptabel. Aunke corte ta emiti richtlijnen, den practica esaki no semper ta wordo sigui pa huesnan. Nos lo kier studia e posibilidad di tambe introduci un Raad van Toezicht pa evalua aplicacion di nos leyman den combinacion cu un corte profesionalisa cu un director y directiva. E Raad van Toezicht por garantiza e calidad legal di huesnan mientras ta mantene husticia su independencia. Incidentenan den partinan Caribense recien ta muestra e importancia di miho

organisa nos corte. Na Aruba un reportero di corte a pasa door di documentonan relaciona cu caso di tata di su yiu, na Sint Maarten e vestigingsmanager a horta 1,2 miyon dollar y na Corsou e ex-presidente di HOF a cobra 250 mil pa aña pa sinta den directiva di Ennia. Mester sigura tambe cu procesamento di casonan ta sosode den un tempo adecua y brinda miho conocimiento di nos leyman den Papiamentu y otro idiomanan. Tambe nos mester mehora procesamento di casonan, husticia mester por funciona den un tempo adecua.

LEGISLACION – DIRECTIE WETGEVING EN JURIDISCHE ZAKEN (DWJZ)

Actualmente e departamento di legislacion y asuntonan huridico ta enfrenta un falta di capacidad cu dificilmente por ser yena a causa di e sistema di salario den gobierno. ACCION21 kier modernisa e sistema di salario den gobierno cu nos ta spera lo habri posibilidad pa DWJZ tin capacidad suficiente pa asumi su responsabilidadnan den un termino adecua. Den corte DWJZ no tin un bon track record defendiendo gobierno pero hopi biaha esaki ta relata na e falta di informacion adecua ricibi di hurista di respectivo departamentonan. Nos lo kier mira un evaluacion di e departamento su capacidadnan y tambe mas responsabilisacion di e huristanan den

departamentonan, no ta aceptabel cu gobierno ta perde mayoria di su casonan den corte costando pais Aruba hopi miyones.

PRISON

Nos kier mira un plan structural pa temporalmente aumenta capacidad na nos prison actual cu ta carece di capacidad suficiente y desaroya un plan pa construi un prison nobo siguiendo e ehempel di Bonaire cu tin un di e miho facilidadnan den Caribe. Nos kier instala solar panels pa introduci airco den e celnan mirando e calor intenso cu nos ta bibando algun luna di aña cu ta afecta salud di presonan.

FUSEER INMIGRACION, DOUANE Y GUARDA NOS COSTA

Nos kier fuseer Inmigracion, Douane y Guarda Nos Costa den un Customs and Border Protection (CBP) siguiendo e ehempel di Merca pa aumenta capacidad y eficiencia mirando e retonan creciente den e respectivo departamentonan.

REVISA NOS LEYNAN DI DETENCION

Nos kier mira un revision di nos leyman di detencion, actualmente hopi biaha ta detene un persona riba un diabierna sabiendo cu e no lo wordo interroga prome cu dialuna. Esaki ta un forma di

tortura psicologico cu ta mina e libertad di e ciudadano. Nos kier mira detencion y interogacion inmediato dentro di diesdos (12) ora. Nos ta mira tambe cu personanan ta ser declara sospechoso y actualmente por tarda añas prome cu nan caso yega dilanti corte. Esaki tambe ta un forma di tortura psicologico cu ta mina e libertad di e ciudadano. Si un persona ser declara un sospechoso, su caso mester tuma luga dentro di un periodo di tempo adecua, no mas cu binticuatro (24) luna despues cu su detencion inicial. Nos kier adapta nos leyman pa sigura cu Husticia por haci su trabao y garantis derechonnan basico y humano di e ciudadano.

EXPANDE ACCESO LEGAL GRATIS

Nos ta reconoce cu hopi ciudadano no tin acceso na nos sistema di husticia pa falta di recurso y conocimiento di ley. ACCION21 kier expande acceso legal gratis pa ciudadano di menos recurso y nos kier inclui trabao pro bono como parti di e formacion di abogadonan nobo.

DEPARTAMENTO DI INTEGRACION, MANEHO Y ADMISION DI STRANHERO (DIMAS)

Nos kier reorganisa e departamento y inverti den automatizacion y digitalizacion pa tur permiso ser trata den e periodo stipula pa ley cu no ta e caso actualmente. Nos kier desaroya un plan structural pa maneho di stranhero

tumando na cuenta proyecionnan demografico y e realidad cu Aruba ta sobrepopula.

Algun cambio den maneho cu nos kier implementa:

- Nos kier duna mayornan di baby stranhero naci na Aruba mas tempo pa cumpli cu e garantia pa nan recién naci. Actualmente mayornan Filipino of Chines mester paga un garantia di mas cu AWG 5.600,- ora nan baby nace pa sigura su permiso y consecuentemente acceso na AZV. Nos kier ofrece mayornan di baby stranhero naci na Aruba un periodo mas largo pa cumpli cu e pago di garantia di p.e. cinco año cu pagonan regular cada año te ora alcanza e suma;
- Mirando cu mas cu sesenta (60) porciento di permiso cu wordo nenga pa falta di documento of un documento incorrecto ta wordo bolbe sometí, nos kier introduci mas flexibilidad pa coregi un solicitud incompleto of incorrecto pa reduci e cantidad di aplicacion cu DIMAS mester tramita;
- Nos kier revisa e derecho di reunificacion familiar, actualmente un stranhero tin derecho riba reunificacion familiar despues di unicamente tres permiso. Mirando cu Aruba ta sobrepopula ta importante pa nos modifica esaki y restringi derecho di reunificacion familiar te despues cu un inmigrante tin firma

liber y/of elimina e derecho durante periodonan di desempleo of tanten nos ta sufri di sobrepoblacion. Ta importante desaroya un plan structural pa maneho di inmigracion cu ta incorpora necesidadnan demografico pa sigura pensioen di nos ciudadanonan, salvaguardia nos medio ambiente y fortifica crecimiento economico;

- Studia expande permiso di trabao automatico pa pareha di inmigrantenan residencia na Aruba.

ADAPTA Y APLICA NOS LEYNAN DI ADMISION

Nos kier mira e siguiente cambionan y aplicacion di nos leynan:

- Un stranhero cu yega Aruba cu un permiso pa trabao domestico por unicamente eherce trabao domestico te despues cu e logra firma liber, no tin flexibilidad pa cambia pa otro tipo di permiso;
- Un persona cu viola nos leynan di admision ta ser exclui di entrada y residenciapaunperiododiminimodias (10) aña sin posibilidad di exoneracion (excluyendo ciudadanonan di Reino);
- Un persona cu aplica pa asilo no por aplica pa ningun otro tipo di permiso y si su peticion keda nenga mester bandona pais Aruba y ta exclui di entrada y residencia pa un periodo di dias (10) aña;
- Un persona cu traha ilegalmente sin

permiso of den un trabao of pa un negoshi no autorisa ta ser exclui di entrada y residencia pa un periodo di minimo dias (10) aña sin posibilidad di exoneracion (excluyendo ciudadanonan di Reino). Introduci castigonan mas pisa pa dunadonan di trabao cu ta emplea personanan indocumenta manera boet di p.e. AWG 50.000,-

REGULARISA PERSONANAN INDOCUMENTA

ACCION21 a presenta un mocion 16 april 2024 pa regularisa temporalmente personanan indocumenta cu ta cumpli cu rekisitonan dirigi riba salvaguardia y promove interes general, manera un limite di edad, limite di reunificacion familiar, certificado di buena conducta y por lo menos tres aña bibando na Aruba. Partido RAIZ tabata co-iniciado di e mocion, partido AVP a sostene e mocion mientras partido MEP, Gerlien Croes (FUTURO) y Ryçond Santos do Nascimento (LPR) a vota contra cu consecuencia e no a ser aproba. Nos ta keda comprometi na ofrece un bida digno na personanan indocumenta door di ofrece permisonan temporal cu condicion.


Empleo di personanan indocumenta ta keda un problema grandi na Aruba cu ta afecta nos ciudadanonan di menos recurso mas severamente. Un trahado

Arubano no por competi cu un persona cu ta traha pa menos cu salario minimo. E personanan aki por ta nos bisña, nan yiunan a lanta aki y nos ta kere cu hopi ta forma un parti integral di nos comunidad. Actualmente hopi ta traha den economia informal y no ta contribui na AZV of paga AOV. Nos ta kere ta importante combati empleo ilegal, pa logra esey mester regularisa gran parti di esnan indocumenta cu permisonan temporal. Na mesun momento ta importante introduci castigonan mas pisa pa dunadonan di trabao cu ta

emplea personanan indocumenta manera boet di p.e. AWG 50.000,- Un estudio cientifico na 2022 di un muestra aleatorio di 1.200 residente Arubano cu nacionalidad Hulandes y derecho di voto a indica cu sesenticinco (65) porciento ta na favor di regularisa esnan indocumenta pa nan tambe contribui na AZV y AOV etc. ACCION21 ta na favor di regularisa esnan indocumenta bao condicionnan cu permisonan temporal.

Regularisa tur persona indocumenta pa nan tambe por contribui na AZV, belasting, SVb etc.?

65% di esnan entrevista ta na favor pa regularisa tur persona indocumenta cu obhetivonan specifico, contra di 35% cu no ta na favor.



APRIL 2022 ARUBA



Regularisa tur persona indocumenta pa nan tambe por contribui na AZV, belasting, SVb etc.?

	SEXO		EDAD				NIVEL DI EDUCACION							TOTAL
	Homber	Muhe	18-29	30-44	45-59	>=60	Enseñansa Basico / EPB	MAVO	HAVO	VWO	MBO	HBO / Bachelor's	Enseñansa Universitario / Masters / Doctorado	
Si	64	66	70	73	61	58	67	65	63	46	66	66	63	65
No	36	35	30	27	40	42	33	35	37	55	34	34	37	35
TOTAL	100	100	100	100	100	100	100	100	100	100	100	100	100	100

APRIL 2022

ARUBA

REFUGIADONAN

Semper mester tene cuenta cu nos balornan di yuda nos bisiña y mester reconoce cu e necesidadnan na nos pais bisiña Venezuela a causa un crisis humanitario cual ta afectando nos den hopi sector. Nos ta na favor di un sistema humanitario pa trata esnan cu ta pasando necesidad pero sin cu esey ta crea necesidad pa nos mesun poblacion. Nos mester establece convenio cu otro paisnan manera Canada, Australia, Merca y paisnan Europeo pa acepta sikiera parti di e poblacion di refugiado actualmente na Aruba paso nos no tin e capacidad di absorbe tur.

Ta estima cu tin mas o menos entre 10.000-20.000 refugiado Venezolano na Aruba y ainda no tin un registracion di nan cu ta preveni nos pidi fondo di ayudo di UNHCR y otro instancianan internacional pa nan cuidado. Aruba tin obligacion bao di e Convencion di Ginebra pa cu refugiado pero nos no tin e conocimiento ni e recursonan pa procesa e aplicacionnan di asilo y tampoco e infraestructura pa carga e cantidad di persona cu ta aki nan. Un inventario lo ta necesario pa establece cuanto nan ta, den ki condicion nan ta biba y ki talento nan por tin pa nos economia. Mirando cu nos ta un isla chikito caminda desaroyo ya caba a destrui nobenta (90) porciento di nos naturalesa, comunidad internacional mester reconoce cu nos capacidad pa acepta refugiado ta limita.

#BanBibaMiho
WWW.ACCION21.COM



ACCION★21
PLAN DI
PARTIDO
2025 - 2029

#BanBibaMiho
WWW.ACCION21.COM